

LEPATO

1 Ntate ea bokoang oa Leholimō, athe—athe Boteng ba Moea o Halalelang bo se bo fihlile mona, re atamela Lentsoe la Hao le Halalelang. 'Me koana ka lentsoe le lebe ke ntse ke leka ho le khina, le ho bua mantsoe a 'maloa feela butle le ka botsitso boo nka bo khonang, ke kōpa tataiso ea Hao e Khethehileng le komelo ea Moea o Halalelang ho haola har'a rōna bosiusing bona. Ho Eo E leng motlalahohle, A ke a nke Lentsoe la Molimo ho Le abela pelō e 'ngoe le e 'ngoe, ho latela tlhoko ea rōna feela. 'Me bosiusing A re fepe, ka lintho tsa Molimo tse molemo.

2 'Me bosiusing bona, re sa bua ka Lentsoe, lipelō tsa rōna li kenelle limaele tse ngata Kalvari, moo Jesu a lefileng moperutso o ruileng bokhoni-bohle o batluoeng ke likahlolo tse khōlō tsa Molimo, ho tsoa tšimong ea Edene. 'Me kajeno re lemohe hobane re beiloe ba lōkileng ntle le moperutso ka tsoho ea Hae, le ka lefu la Hae, ho patoa, le tsoho.

3 'Me bosiusing bona ha re sa le ba lefatše, hoba re rekiloe ka moperutso oa Mali a thata a Mora oa Molimo. 'Me rōna, ka lipelō tse tletseng teboho, re shebe ho Uena bosiusing bona, ka mohopolo ohle le ka matla, le ka se ahileng ka ho rōna, le ho U sebeletsa ka pelō e hloekileng, e se nang sekoli.

4 Aba sena Ntate, bosiusing bona, ba sa U tsebeng ha ba le teng mona, ka mokhoa oa teballo ea libe tsa bona, bosiusing bona ba tle sefapanong ka boikokobetso, 'me teng ba ipolele libe tsa bona ho Molimo o nang le toka, ho tšoarela. 'Me bosiu bona bo be boholo ho rōna bohle. Re e kōpa ka Lebitso la Mora oa Hao, Morena Jesu. Amen.

5 Joale re a lemohe hobane ha ho mang, lefatšeng, ea bokhoni bo lekaneng ho tšoara Lentsoe la Molimo le ho Le senola, hobane Lentsoe le ngotsoe ka pululelo. Moea o Halalelang ke Moqapi oa Lentsoe.

6 'Me mohla ho batluoeng e mong, Leholimōng, ea nkang Buka a manolla Litiiso, ha ho a fumanoa e mong Leholimōng, le ha e le lefatšeng, le ha e le tlas'a lefatše, ea nang le tokelo ho manolla Litiiso, le ha e le ho sheba Buka. 'Me Teng ha fumanoa Konyana e hlabiloeng e sa le ho theoa lefatše, 'me O tlide a nka Buka letsohong le letona la Ea lutseng Teroneng, 'me ea manolla Litiiso ea phetla Lentsoe.

7 'Me bosiusing bona re a lumela re bile re tšepetse ho Eèna, ho re O tla re bulela Lentsoe, le joaloka ha ke bala ho Liketso khaolo ea 2.

8 Joaloka ha ke tsebisitse, bosiu ba pele e ne e le *Ho Khutla Labobelī*, 'me . . . ha Morena Jesu, e leng Laboraro. 'Me Labone

bosiu e ne e le *Sehlabelo Se Ruileng Bokhoni-Bohle*. 'Me Labohlano bosiu e ne e le holim'a *Pheko E Ruileng Bokhoni-Bohle; Phetheho*. Na le e tšoere maobane bosiu? *Phetheho*, eo ka eona re ka ema re se na sekoli le ka phetheho ka pel'a sefahleho sa Molimo! 'Me bosiusing bona e holim'a *Lepato*. 'Me hosane, *Tsoho*. Ha matsatsi a ntse a lebalisana joalo feela.

⁹ Joale bosiusing bona ke khethile, palo ea Lengolo la ka, ho tsoa ho Buka ea Liketso, khaolo ea 2 le litemana 25, 26, le 27, 'moho. 'Me Le baloa ka mokhoa ona, Petrose o a bua.

Davida, hobane Davida ha a 'moletse o itse, Ke beile Morena kamehla pel'a mahlo a ka, hobane o letsohong la ka le letona, ke tle ke se ke ka sisinngoa:

Pelō ea ka e thabile ke hona, le leleme la ka le nyakaletse; esita le eona nama ea ka e tla phomola ka tšepo:

Hobane u ke ke ua ea tlohela moea oa ka liheleng, Mokhethoa oa hau u ke ke ua ea Mo lesa hore a bone ho bola.

¹⁰ Ke mohlolithero oa bosiu bona o khabane hle, ho ntša theromabapi le ho hlahleloa ha Hae lebitleng.

¹¹ Ntho ea pele eo re lakatsang ho e sheba . . . ho hulela maikutlo a lōna ho eona, ke ho se fanye ha Lentsoe la Molimo. Molimo o boloka Lentsoe la Oona, ho fihla letereng. 'Me bosiusing bona re batla ho tlamella mehopolo ea rōna tabeng eo, hore Molimo o boloka Lentsoe la Oona. Re ka phomola re tiile hore sohle seo Molimo o se boletseng Lentsoeng la Oona, ke 'Nete. 'Me tumelo ha e phomole holim'a mahlabathe a ritsang a mehopolo ea motho kapa thutamolimo ea motho, empa e iphomolela khetlo la ho qetela holim'a Lefika le sa sisinyeheng la Lentsoe la Molimo la Bosafeleng.

¹² Lentsoe! Haeba Molimo o e buile, ke 'Nete kamehla. A ke ke a le khutlisa le ho re, "Ke ne ke sa tiea." Nka bua lintho le uena ua bua lintho, re lemaletse ho e khutlisa, hobane re e buile ka bokhoni ba tsebo ea rōna le ka bokhabane ba boitsebelo ba rōna. Empa, ka hona, Molimo o fapane le rōna haholo. O hloka pheletso, ka baka leo ha O bolele letho le sa phetheha ka bottlalo. Ha O a tlameha ho e khutlisa le ka mohla, ha o a tlameha ho kōpela seo O se boletseng tšoarelo. Se ema kamehla, 'Nete.

¹³ Esita le sebakeng sa Jesu, matsatsing a maholo ana ao re a ketekang, ka tšoanelo mohla Molimo o no o hlabela Mora oa Oona libe tsa lefatše, e ne e ka ba lilemo tse likete le pele motheo oa lefatše o beoa. Molimo o buile Lentsoe, 'me Ke mosebetsi o se qetiloeng Leholidōng ha Molimo o e bua; e se e qetilo. Oh, hola feela re ka tšoara seo e se bolelang, re be re ka ba batho ba fapaneng hakakang! Ho bona Libukeng tsa Hae, likahlolo tse baletsoeng ba hanang ho utloa, motho o ne a tla itekola, hora le hora; 'me e ne e ka thabisa ba lōkileng, hora le hora,

ho bala mahlohonolo ao Molimo o a baletseng batšepehi. 'Me re ka iphomolela ka tšepo hore Lentsoe le leng le le leng le tla phethisoa, ho ankora moea oa rōna ho lona feela. E sa le ho lutse joalo.

¹⁴ Mohla Molimo o buang le Nohe, morao koana lefatšeng la pele ho moroallo; mohlomong le pele Bibele e ngoloa, kapa eona Bibele ena, le hona, e ka ngoloa le ka mohla; Molimo o boleletse Nohe ka sekhhola se tlang ho tla, le ka metsi a tla koahela lefatše. 'Me kantle ho thojana ea bopaki bo reng e tla etsahala, ntho e 'ngoe le e 'ngoe e eme khahlano, Nohe a susumetsoa ke tšabo, eaba o haha areka, a e hlophisa. E ne e tla pholosa eèna le ba lelapa la hae. Molimo ha o a ka oa mo soabisa, hobane e ne e le Lentsoe la Oona. E ne e tlameha ho etsahala ha Molimo o e boletse e tla etsahala.

¹⁵ Joale, mohla Jobo, Buka ea khale ka ho fetisisa Bibeleng, e ngotsoeng mohlomong le pele Genese a ngoloa, 'me e ne e kenyeteletsoe Bibeleng. 'Me Moshe o ngotse Genese. Jobo, Bukeng ea hae, o kile a iphomolela ka bottlalo tšepisong eo Molimo o 'maletseng eona. 'Me a emela secheso sa sehlabelo sa hae, a sa tšabe letho pelōng ea hae; a ntse a tseba hobane, seo Molimo o se boletseng, Molimo o bokhoni ho se phethisa. 'Me mohla tsohle li bonahetseng li eme khahlano, Jobo a setlela hobane tšepiso ea Molimo e ne e setletse. Molimo o no o tšepistse Jobo, 'me Jobo a phomola holim'a tšepiso eo.

¹⁶ Oh, hola kereke e ka finyella moo e ka iphomolelang ka ho shoerella holim'a Lentsoe la Molimo la Bosafeleng hore ke 'Nete! E ka ba phapang e kakang, ho ka hlaha tokiso e kakang, ho ka pongoa tse kakang, ho ka fihla thabo e kakang, ho ka fihla matla a makakang, mohla monna le mosali ba amohelang Molimo ka mokhoa oa 'ona, seo O se boletseng ke 'Nete. Ho sa tsotelehe chebeho ea maemo, ha e amane le eona ka letho. Molimo o boletse; ke phetho!

¹⁷ 'Me Jobo, mehleng ea nako e thata ka ho fetisa boiphihlelong ba hae bohole; mohla a fihleloang, ka pel'a Sefahleho sa Molimo, e le monna ea lōkileng. Esitile le Molimo o 'mitsitse ea phethehileng. Ho se ea joaloka eèna lefatšeng. 'Me Satane a fuoa monyetla ho mo leka, ho re, "Ke tla U rohakisa eèna sefahlehong sa Hao."

¹⁸ 'Me o ne a batle a tlosa bophelo ba Jobo, 'me a ka be a khonne, empa Molimo oa beha moeli, ho re, "U ka mo etsa tsohle, ha e se ho tlosa bophelo ba hae."

¹⁹ Mohla Jobo a emeng motsotsong o mahlonoko ka ho fetisa le o hlokolosi, o itse, "Ke a tseba Molopelli oa ka o a phela, 'me O tla ema lefatšeng matsatsing a bofelo. Leha liboko tsa letlalo li senya 'mele ona, ke tla bona Molimo ka nama ea ka." Ho sa tsotelehe lefifi le bonahala le aparetse hakae, le kamoo e shebehang e se 'nete, Jobo o ne a ankorile moea oa hae holim'a

ho hong, tsepiso ea Molimo ea Bosafeleng. Oh, hola re ka etsa joalo feela! Lemohang, o ne a phomotse tsepisong, “Ke a tseba Molopolli oa ka o a phela.”

²⁰ ’Me ke batla le lemohe, ke batla ho bua sena bakeng sa mantsoe a tla latela. Jobo o thontse moo a tla patoa teng, o ile a patoa joalo.

²¹ Monna o ne a le teng, a bitsoa Abrahama, eëna a nkile Molimo Lentsoeng la Oona. ’Me a lumetse Molimo. ’Me o bitsitse lintho tse khahlano le tsepiso eo Molimo o mo fileng eona, eka hojane li le sieo. A nka Molimo Lentsoeng la Oona. ’Me hoba matsatsi a fete, le liveke le likhoeli, esita le lilemo tsa feta, hoo ha ho a nyahamisa Abrahama le hang. Bibele e boletse, “A se ke a sisinyeha, ka ho se lumele, tsepisong ea Molimo; a mpa a tsepahala, a ntse a boka Molimo.”

²² Mohla sohle se bonahetseng, letsatsi ka leng, ha ’na ha mpefala letsatsi ka leng; empa sebakeng sa ho fokola, Jobo a ipha matla letsatsi ka leng. Oh, re tšoere kholiso e bokoang hakakang! ’Me mohla bothata bo hlahang eka bo etsa joalo, eka holane seo Molimo o se tsepisitseng, ha se khonehe; sebakeng sa ho honyela, ho khutlela morao lefatšeng, re tlameha ho ema re tiile ho feta kamoo re kileng ra ema, holim’ a HO RIALO MORENA. Ha Molimo o bolela taba, e tlameha ho e batalatsa.

²³ ’Me Abrahama o bitsitse lintho tse leng teng, e ka hoja li ne li le sieo, hobane li eme khahlano le Lentsoe. ’Me e ne re ha Abrahama a lahleheloa ke moratuoa oa hae le mohatsae, Sara, hoba ba phele ’moho lilemo tse ngata, o ne a reke setša haufi le moo Jobo a patiloeng, eaba o pata Sara. Ke ipotsa lebaka? E ne e le baporofeta! Ba bone! Ba ne ba holehane le Molimo! ’Me joale mohla Abrahama a na a shoa, o patuoe le Sara.

²⁴ Joale, ha a batla ho fuoa setša seo sa mobu ke mathaka ana. O se rekile, pontšeng ea lipaki. Papiro e ntlehali ea kolobetso. O se rekile, pontšeng ea lipaki, hore e ne e le thepa ea hae. Oh, molumeli oa sebele o tlameha ho tla joalo, a sa khukhunene koung nqa e ’ngoe, empa ho ema pontšeng ea lipaki, “’Na ke paki ea Morena Jesu, le ea Moea o Halalelang, le ea mesebetsi ea Oona e meholo,” ’me haholo ha re bona letsatsi le khopo lena le atamela.

²⁵ ’Me ebile mohla mora oa Abrahama, e beng e le Isaaka, tsepiso e ne e tla fuoa eëna. ’Me Isaaka mohla a shoeleng, o patuoe le Abrahama. ’Me Isaaka o tsoetse Jakobo.

²⁶ ’Me mohla Jakobo a na a shoa, tlase koana Egepeta. Empa le lemohe, le pele a eshoa, o boleletse mora oa hae oa moporofeta, Josefa, “Tloo koano, mora, beha letsoho holim’ a noka ea ka e holofetseng.” Hoba le hopole kamoo kholofalo ea hae e hlahileng, ka hobane Lengeloi la Morena le amile noka ea hae, eaba o qhiletsa ho tloha mohlang oo. O itse, “Beha letsoho la hao holim’ a noka ea ka, ’me u ntlhapanyetse ka Molimo oa bontata

rōna, u ke ke ua mpata tlase mona Egepeta.” Hobaneng? Oh, ba ne ba tšoere Lentsoe, ba ne ba tšoere tšenolo!

²⁷ ’Me na nka khefutsa mona, ho bolela hobane kereke ea Molimo o phelang e hahiloe holim’ a tšenolo e Mokhethoa; e seng holim’ a mokha oa bolumeli, mokhatlo, e seng holim’ a lihlomathiso le lithuto, empa holim’ a ’Nete e senotsoeng ka moea ea Molimo o phelang.

²⁸ Abele, tšimong ea Edene, o ne a e tšoere mohla kereke e qalang. O tsebile joang ho tlisa konyana? Hobaneng a sa hlahisa tholoana joaloka Kaine? Empa o ne a e senoletsoe!

²⁹ Jesu o kile a bua, ho re, “Ke le Mora motho batho ba re Ke Mang?”

“Ba bang ba itse U ‘Moshe,’ le ‘Elia,’ le joalo.”

O itse, “Empa lōna le re Ke Mang?”

³⁰ Ua bona, ha e a itšetleha holim’ a maikutlo a motho, ke seo u se tsebang e le ’Nete. “Uena u reng?” Potso eo e ka tobana le e mong le e mong oa rōna bosius bona, “Uena u reng?”

³¹ ’Me Petrose o buile ka potlako, a sa tsilatsile le hang, ho re, “U Kreste, Mora Molimo o phelang.”

³² Joaloka Jesu Ea tsebileng makunutu a lipelō tsohle, hoba E ne e se letho haese Jehova ea bonahetseng nameng, ’me O itse, “U lehlohonolo uena, Simone, mora Jonase, hoba ha se nama le mali a u senoletseng eona, empa Ntate oa Ka ea Leholidmōng o entse sena. ’Me holim’ a lefika lena Ke tla haha Kereke ea Ka, ’me likhoro tsa lihele li ke ke tsa E hlola.”

³³ ’Me rōna batho ha re tsoelapele, rōna Lutherane re batla ho tsamaea ka tumelo, rōna Methodise re batla ho O fumana ka ho hlaba litlatse, lōna Mapentekosta le batla ho O fumana ka ho bua ka lipuo, empa e hole le Oona ka limaele tse leshome la milione.

³⁴ Ke tšenolo e Khethehileng ea Morena Jesu Kreste, Botho ba Boleng ba Hae bo bonahalang pelōng, “Holim’ a lefika lena Ke tla haha Kereke ea Ka, ’me likhoro tsa lihele li ke ke tsa e hlola.” E sebetsa ’moho ka ho phethahalo le Mattheu . . . : 24, 5:24, kapa Santa Johanne 5:24, “Ea utloang Mantsoe a Ka, ’me a lumela ho Ea Nthomileng, o na le Bophelo ba kamehla; ’me a ke ke a tla tsuong, empa o tlohile lefung ho ea Bophelong.” E seng kahobane o hatile khato efe, maikutlo afe; empa hobane u fumane monyetla oa Kreste ea senoletsoeng uena ho tsoa Leholidmōng, “Holim’ a lejoe lena Ke tla haha Kereke ea Ka.”

³⁵ ’Me eaba, Jakobo, mohla a shoang, bara ba hae ba jere setopo sa hae, ’me o patuoe le Abrahama, Isaaka, Sara, le Jobo, Mafatšeng a Halalelang, ka har’ a Palestina.

³⁶ Hape, Josefa, ka ho ba moporofeta. O ile a atleha tlase Egepeta. O ne a tsebile Molimo. ’Molimo o no o Itšenoletse eēna. ’Me mohla a na a shoa, ho itsoe, “Le se ke la pata masapo a ka

tlase mona, le mpe le behe . . . mohla . . . Ruri Molimo o tla le etela tsatsi le leng!" Hobaneng? O ne a iphomoletsa ka ho shoearella holim'a Lentsoe la Molimo ho Moshe, "Ba tla sebeletsa sechaba sena lilemo tse makholo a mane, empa Ke tla ba ntša." O ile a itšetleha Lentsoeng ka ho shoearella.

³⁷ 'Me ke setšoantšo se setle hakakang mona, haeba le ka lemoha. Moheberu e mong le e mong ea fetang, ka mokokotlo o tetekiloeng, ke balaoli ba makhaba. 'Me e ne re ha a sheba masapo a moporfeta oa hae, Josefa, o tsebile ba tla tsoa tsatsi le leng. Hoba, masapo ao a siloe mono e le sehopotso, tsatsi le leng ba tla tsoa.

³⁸ Ho se ho batla ho fetile lilemo tse leshome le metso e mehlano kapa tse leshome le metso e robeli mohla Billy Paul, moshanyana a ka ba lilemo li hlano, a batla a sa . . . Re ne re isa palesa lebitleng la mommi oa hae, ha letsatsi le chaba hoseng ho hong, ka Paseka, ha letsatsi le nyoloha feela, le hlahisa hlooho; kapa pejana ho ela, ho joalo, re ntano ea tšebeletsong. 'Me eitse ha re theohela lebitleng, mothoana eo a rutla katiba ea hae ha re atamela moo khaitseli ea hae le 'mè oa hae ba patiloeng. 'Me a qala a habea a lla, 'me a re, "Daddy, na mommi o tlase mono ka mokoting oo?"

³⁹ Ka re, "Che, mora. Ha a tlase mono ka mokoting oo. O betere ho feta 'na le uena makhetlo a milione."

A re, "Na ke tla bona mommi hape?"

⁴⁰ Ka re, "Ka mohau oa Molimo, ha u rata, u ka boela oa 'mona."

Ho re, "Na 'mele oa hae o tla tsoa lebitleng lena le ka mohla?"

⁴¹ Ka re, "Moratuo, tutubala, ke u phetele palenyana. Lilemo tse makholo a mangata tse fetileng, hoseng hona, ho ne ho sale lebitla le feela." Ka re, "Ke sehopotso. 'Ba robetseng ho Molimo Kreste o tla ba hlahisa le Eèena mohla A tlang.'" Ha ho seriti sa pelaelo, ke iphomoletsa holim'a tsepiso ea Molimo ea Bosafeleng ka ho shoearella!

⁴² Joaloka Jobo oa boholoholo, e tla re ha re utloa seo "molora moloreng, le lerole leroleng," e nkhopotsa Longfellow, ea itseng:

Se mpolelle, ka lipolelo tse boholoko,
Bophelo ke toro e fofotho feela!
'Me moea o otselang o shoeelle,
'Me lintho ha li a ema ka chebeho ea tsona.

O itse:

Yaa, bophelo bo tiile! Bophelo bo tebile!
'Me lebitla ha se phehHello ea bona;
Hoba u lerole, u tla khutlela leroleng,
Ho ne ho sa lekanngoe moea.

⁴³ Ba o bitsa theophani, mohla re fallang mona re kena nqa e 'ngoe. E ka bang eng, ke nka Lentsoe la moapostola, mohla

a itseng, “Efela mohla tabernakele ena ea lefatše kapa leaho le senyehang, re na le e re emetseng, ho tsoa ho *ena* ho kena ho Eane.”

⁴⁴ Abrahama, Isaaka, Jakobo, Jobo, baporofeta bohole, ba ne ba tsepile ba lumetse ho tsoho e tlang ho hlaha, ha thoe Molopolli o tla tla. Ba Mo porofetile. Henoke o Mo porofetile; a iphomolela ka ho shoearella, a tiisa bopaki ba hae ka eona. Isaaka, Jakobo, Daniele, Jeremia, Ezekiele, ba iphomolela ka ho shoearella holim'a mohla Messia a tlang ho khutla.

⁴⁵ ’Me ba shoele le meea ea bona ea kena Paradeising. Ba sitiloe ho kena ka pel'a Sefahleho sa Molimo, hobane (re ne re e tsoere maobane bosiu) ha thoe mali a lipoho le a lipoli a sitiloe ho tsoarela libe; a koahetse libe feela, a bua ka letsatsi leo Sehlabelo se phethehileng se tlang ho fihla ka lona; hoba mali a phoofolo a sitiloe ho khutlela holim'a morapeli, hola ha ho joalo morapeli a ka be a sa lesa ho hlahisa mahlabelo a mofuta oo.

⁴⁶ Empa mohla Mora Molimo a na a shoa, Bophelo bo nong bo ahile ho Eèna e ne e se ba e mong haese ba Molimo, ho khutla le ho re beha bana lelokong la Molimo. ’Me joale re bana ba Molimo, Bophelo bo tsoang Maling a Oona.

⁴⁷ Joale lemohang ka potlako, re sa e sala morao. Morao Testamenteng ea Khale, le bao ba lumetseng ’me ba rapetse, ’me ba shoetse Tumelong, ba emetse nako eo. Lebaka leo baporofeta bao ba entseng hoo, ’me ba batlile ho patoa Palestina, ba tsebile tsoho eo e sa tlo hlaha Egepeta. E ne e tla etsahala Palestina, feela.

⁴⁸ Lebaka leo ke rialong bosiung bona: Ke qhoaetsoe mabitso a mefuta eohle; ha ke tsotelle seo batho ba mpitsang sona, ha e bolele letho ho 'na. Ke batla ho etsa ho le hong feela, ho tseba sena: hore ke shoele, ’me bophelo ba ka bo patuoe ka ho Kreste, ka Molimo, le ho tiisoa ke Moea o Halalelang; hore mohla A bitsang har'a bafu, ke tla araba letsatsing leo. Mpate ka ho Kreste, hobane ba leng ka ho Kreste Molimo o tla ba hlahisa le Eèna ka letsatsi lela.

⁴⁹ Re kena joang ka ho Kreste? Bakorinthe ba Pele 12:13, “Ka Moea o le mong re kolobeletsoa bohole ’Meleng o le mong, ’me re behoa baahi-mmoho ba ’Muso oa Molimo.” Re ipolela hoba re baeti le bafeti lefatšeng lena, hape, ha re sa batla lintho tsena tsa lefatše, empa re shebile ho khutla ha Khosi e bokoang ho nka borena, ho qala leoatleng ho isa leoatleng le sa ralloang moeli, mohla A tlang ka Khanya ea Hae. Ruri, re shebeletse ho Khutla ha Hae.

⁵⁰ ’Me ha ho pelaelo kelellong ea ka, Jesu o ne a e hopotse kelellong ea Hae mehleng ea Hae mona lefatšeng, e ne e le ho se tlaile hoo ha Lentsoe la Molimo la Bosafeleng. Hoba, re tseba ka ho Eèna ho ne ho ahile bottlalo ba Bomolimo ka ’Mele. Bomolimo bohole bo ne bo ahile ka ho Eèna. E ne e le Ntate ’moho,

Mora, le Moea o Halalelang, empa ho aha ka sebopeho sa motho; theophani ea Molimo, setšoano se seholo sa Molimo seo O entseng motho ka sona, a ntoo mo beha lefatšeng. O ne a na le 'mele. Ha se Molimo o se nang 'mele. Molimo o na le 'mele, 'me o tšoana le motho. Moshe o o bone, ba bang ba o bone, 'me o tšoana le motho.

⁵¹ 'Me e mpa e le khatiso, *sena* se joalo, ea seo Sane se leng sona. 'Me sohle se leng lefatšeng, botle, mosa, botle ba lefatše, ha se letho lefatšeng empa ke karabo ea ntho e fetang eo ka molemo, e leng se re emetseng mohla re tlohang lefatšeng lena. Hoba, sohle se lefatšeng se tšoantšitsoe feela le se Leholimōng. Sohle se molemo, sohle se lōkileng, sohle se settle, lifate, linonyana, sohle, e mpa e le paterone ea se leng Leholimōng.

⁵² Bophelo ba rōna ka sebele ke paterone feela. Ke seriti feela, 'me ha se ntho ea sebele. Ke lehlakore la neketifi. Ho batlahala lefu ho hlatsa setšoantšo, ho re khutlisetsa ho theophani eo re tsoang ho eona. Ebe tsohong re hlaha ka setšoano sa Hae, 'mele o tsositsoeng. Ke botle bo bo kakang; ha se botle feela, empa ke ntho ea sebele, 'Nete e shoeletseng ea Lentsoe la Molimo la Bosafeleng, hore re tla tšoana le Eèna.

⁵³ Joale lemohang, Jesu, ea hlometsoeng ka matla ohle a Molimo, empa, mohla A kōpaneng le Satane, ha A sebelisa matla afe Hae. O buile ka Lentsoe feela! O entse joalo. O itse, "Ho ngoliloe, 'Motho a ke ke a phela ke bohobe feela, empa le ka Lentsoe le leng le leng le tsoang molomong oa Molimo."

⁵⁴ Eba u ka rialo joang ho re u ka itulela hae 'me ua 'na ua ba Mokreste hakaalo ka ha u le kerekeng? U ke ke ua khona. Bala Lentsoe! Moea o Halalelang o ja Lentsoe. Bibele ke lijo tsa Molimo tsa moea ho Kereke ea Hae. 'Me Moea o Halalelang ke Oona O tlisang u tlisetsang Lona le ho Le beha pelōng, 'me uena u Le nosetsa ka teboho. 'Me tsepiso e 'ngoe le e 'ngoe e Mokhethoa e tla hlahisa hantle feela seo Molimo o boletseng hobane e tla se etsa. Le tlamehile joalo. Ke Lentsoe la Oona, 'me Ke Bophelo.

⁵⁵ Joale, ke lebetse hoba ke ne ke tlamehile ho nka halofo ea hora feela. Ke nka nako e telele hakana ho finyella seo ke batlang ho se bua.

⁵⁶ Empa lemohang Jesu horeng ea ho qetela, kapa tse peli, tsa Bophelo ba Hae, ho phethiloe liporofeto tse ngata, ngata.

⁵⁷ Motha o itse ho 'na, "Moena Branham, *sena* se tlameha ho etsahala, le *sane* se tlameha ho etsahala."

Ka re, "Se ka etsahala horeng."

⁵⁸ Ha u ka bala Pesalema ea 22, u ntoo sheba hora eo A shoeleng ka eona sefapanong, ke lebala feela liporofeto tse hlahaletseng ka mahetla tse phethiloeng lihoreng tse peli tsa ho qetela kapa tse tharo tsa bophelo ba Hae! Ruri, "Ba hlabilo maoto a Ka le matsoho a Ka. Molimo oa Ka, Molimo oa Ka, U Ntahletse'ng na?" le joalo-joalo, kamoo Davida hooelelitseng kateng.

⁵⁹ 'Me ke batla le lemohe ntho e 'ngoe, 'Nete, karolo e sa fanyeng ea Lentsoe la Molimo. Bibele e itse, "O babaletse masapo a Hae kaofela, ha ho a ka ha robeha le le leng har'a ona." Hoba ka papiso, konyana ea paseka e ne e bapisa hona hoo. Konyana e lōketse ho hloka sekoli, ha ho masapo a konyana a ka robjoang. 'Me ka hora eo A neng a . . . O ne a shoele, eaba ba nyoloha ho roba meomo ea Hae ka noto. 'Me pejana feela . . . Shebang ka eona hora e hlokosi eo! Monna ea tšoereng noto, a le mothating oa ho otla meomo ea Hae, empa Lentsoe la Molimo le itse, "Ha ho lesapo la 'mele oa Hae le tlang ho robeha."

"Ebe e tla etsahala joang?" Rōna re a potlaka.

⁶⁰ Lentsoe la Molimo ke la Bosafeleng! Haeba Lentsoe la Molimo le phethahetse hakaalo, ba leng ka ho Kreste ruri ba tla tsoha ka ho tiea joaloka ha tsoho e le teng. Molimo o tlamehile hakaalo Lentsoeng la Oona, ho u folisa, joaloka ha A tla u pholosa. Hoba, Eèna, ke Lentsoe la Oona le e tšepisitseng. Ke Lentsoe la Molimo, 'me ha re a tšoanelia ho Le fokotsa. Empa feela ho re, "Ke 'Nete." Le lumele! Ho sa tsottelehe se etsahalang, Le lumele, le ha ho le joalo. Ba bang bohole ba ne ba tlameha ho Le lumela joalo, 'me le rōna ha re a behelloa kathoko. Molimo o file Iseraele Palestina, empa ba ne ba lokela ho loanela noko e 'ngoe le e 'ngoe ea mobu oo ba o hapileng. Tšepiso ke ea hao, empa o tlameha ho loanela noko e 'ngoe le e 'ngoe eo u e tsekang; liabolosi o tla hlokomela hoo, ruri o tla e etsa.

⁶¹ Empa le lemohe mohla ba ne ba itokisetsa ho roba meomo ea Morena oa rōna Jesu, hola noto eo ea otla moomo ea o roba, Molimo o ka be o fumanoe o le leshano. Empa ho ne ho se boliabolosi ba lekaneng linqalong tsohle tse lefifi tse tubang ho lumella noto eo ho otla 'mele o bohlakoa oo. Hoba Davida, lilemo tse makholo a robeli pele ho moo, o boletse, "Ha ho lesapo la 'mele oa Hae le tlang ho robeha." Lentsoe la Molimo le tlameha ho ema e le 'Nete.

⁶² Empa ba entseng mohlang oo? Ba nkile lerumo ba le totometsa lehlakoreng la Hae, 'me ho tsoile Mali le metsi, ho phethahatsa seo Bibele e se buileng, "Ba hlabile matsoho a Ka le lehlakore la Ka." Lentsoe le ne le phethiloe.

⁶³ Joale mohla A na a eshoa, oh, hora e nyarosang hakakang eo! Ke hopola sefela seo, 'me, ka botšepehi, se a ntšosa, ha ke hopola sefela seo seroki se se ngotseng lilemo tse ngata tse fetileng.

Har'a mafika a petsohang le libaka tse
fifalang,
Moloki oa ka a kebisa hlooho ea Hae a shoa;
Lesira le hahotsoeng le butse tsela
Ea menyaka ea Maholimō le letsatsi la
bohloleho.

⁶⁴ 'Me ea re A sa leketlile mono, a fopha mali a eshoa, eitse ha A kebisa hlooho ea Hae, letsatsi la itšoabelia hakana, ho sheba

libopuo tsa nakoana tseo Molimo o li entseng ka setšoantšo sa Oona, o ne a tlameha ho lefa mopupso o mokaalo ho e lopolla, eaba letsatsi le hana ho sheba fatše lefatšeng horeng eo. Khoeli ea retela sefahleho ea ba ea sutha tulong ea eona. 'Me linaleli tsa furalla tsa neha lefatše mokokotlo oa tsona. Sebe e tšoanetse e be e le ntho e tšabehang hakakang, kamoo Molimo o ileng oa lokela ho sebetsana le sona!

⁶⁵ Le ho bona baprista bao ba somang, mathe a ntse a lepellia sefahlehong sa Hae. Monna a Mo otla hlohoong, ka lehlaka, le ho re, "Ha U le Moporofeta, re bolelle ea U tlerileng." E mong oa bona a rutla litelu sefahlehong sa Hae, a Mo jabela sefahleho, 'me a re A Itoanele.

⁶⁶ O itse, "Hola 'Muso oa Ka e ne e le oa lefatše lena, Ke ne ke tla bitsa ho Ntate oa Ka hang, O be a ka romela ho 'Na Mangeloi a lilegione tse leshome le metso e 'meli."

⁶⁷ Malulo a ka be a fetotsoe, empa O ne a ka e etsa joang le ka mohla? O ne a ke ke A khona ho e etsa feela, hoba bana ba Hae ka sebele e ne e le bona ba tsetselelang Mali a Hae. Nahanang ka daddy, ntate, bana ba hae ka sebele (har'a lefifi) ba tsetselela mali a ntata bona ka sebele? Ke ka baka leo A neng a ke ke a etsa letho ha e se ho shoa. Hola A sa etsa joalo, bana ba Hae ba ne ba timetse, libopuo tsa Hae li ne li timetse. Empa A tlameha ho shoa, ho pholosa batho ba Hae.

⁶⁸ 'Me ha A entse joalo, ha A inamisa hlooho ea Hae, lefatše lena la khale la nyaroha mokokotlong oa lona. Le tšoanetse le be le thefutsoe ke methapo, hoba Bibele e boletse "lefatše lohle, ho qala ka hora ea botšeleta ho isa hora ea robong, la fifala, la aparela bophara bohole ba lefatše." 'Me lefatše la sisinyeha, le mafika a petsoha. Le lesira la tempele la taboha ho qala holimo ho ea tlase; linqalo tsa sehlabelo tsa hlanama. Mora oa Molimo o phelang o shoele. A shoa hona ho fihlela letsatsi le elelloa. A shoa hona ho fihlela khoeli e eleletsoe. A shoa hona linaleli tsa ba tsa elelloa. A shoa hona lefatše la ba la elelloa. A shoa hona lielemente tsa lefatše tsa ba tsa eleloa, liatmosefere tsa ba tsa e elelloa. Ntho e 'ngoe le e 'ngoe ea tlameha ho tseba hobane eo e ne e le Mora oa Molimo! Hoba, Lentsoe la Molimo le ne le ke ke la hloleha, O ne a tsepisitsoe, ho tloha tšimong ea Edene, "Peō e neng e tla khoba hlooho ea noha."

⁶⁹ Joale O ne a lhahetsoe ke'ng? O ile kae ha A tloha sefapanong a kena lebitleng la Josefa oa Arimathea?

⁷⁰ O ne a futsanehile hakaale A se na moo A samelang hlooho ea Hae. O tsoaletsoe sejelong, A qhoaetsoe lebitso le letšo, e le "ngoa oa bonyatsi." A tšeihuoa, a songoa, a tloko, lefatšeng. A tšeihuoa, a lahloa. 'Me ha A eshoa, A tlameha ho shoa kahlolo ea lefu, lipakeng tsa masholu a mabeli. 'Me ho se le moo A pateloang teng, 'me A patoa lebitleng la monna e mong. Ona Molimo oa Leholumō o tlang lefatšeng! Re nahana hore re bo

mang, ha re tlameha ho feta matšoenyehong a manyenyane? Seo A re etselitseng sona! E nahane, motsoalle, u e balisise.

⁷¹ Lesole la Moroma le itse, "Ruri, eo e ne e le Mora oa Molimo." Moetsalibe o ne a tlamehe ho e elelloa. Judase o itse, "Ke ekile Mali a se nang molato." O ne a tlamehe ho e elelloa. Lefatše lohle le ne le e elelloe.

⁷² Eaba O ea kae? Motho ha a eshoa, na ke phetho? Che, monghali. O ne a tlamehe ho shoa ka mokhoa oo ka ha Bibele ea Molimo e Mo tlalehile A tla shoa ka mokhoa oo. 'Me O ne a tsepile Lentsoe la Molimo. Ke ka hona A neng a ka re, bophelong ba Hae, "Qhaqhang tempele ena, 'me Ke tla e tsosa ka matsatsi a mararō."

⁷³ Hoba Davida o buile tulong se seng, feela e le ka Bibeleng, tlas'a pululelo, mohla Davida, monna oa Molimo, moporofeta ea tlotsitsoeng ka Lentsoe, a boletseng, "Nke ke ka tlohela Mokhethoa oa Ka hore A bone ho bola, Nke ke ka lesa moea oa Hae liheleng."

⁷⁴ Jesu o itse, "Qhaqhang 'mele ona, 'me Ke tla o tsosa ka matsatsi a mararo." O tsebile hobane Lentsoe la Molimo le ke ke la hloleha. Oh, banna!

⁷⁵ Efèla ha A khonne ho tiisetsa taba eo ka ho shoearella, ho lumela hobane Lentsoe la Molimo le ke ke la hloleha, hakakang le rōna re ka tiisetsa ka ho shoearella ra re re tsoetsoe bocha ke Moea o Halalelang, 'me O paka pelōng tsa rōna hona joale ho thoe re a tseba hoba Molopelli oa rōna o a phela 'me o tla khutla tsatsi le leng. Ho iphomolela ka kholiseho hobane ba shoetseng ho Kreste Molimo o tla ba hlahisa le Eèna! Joale lemohang.

⁷⁶ E ne e le Eo. O tsebile ho se sele le e 'ngoe e tla bola 'meleng oo. Lihoren tse mashome a supileng a metso e 'meli, ho bola ho a kena. Lebaka leo A sa kang a lula matsatsi a mararo. O shoele Labohlano thapama, a nyoloha Sontaha hoseng. Empa, e ne e le lipakeng tsa matsatsi a mararo ao. Lipakeng tsa matsatsi a mararo ao O ne a tlameha ho tsoha hape, hobane O ne a tsepile Lentsoe la Molimo.

⁷⁷ Ke enoa A tloha! Ebe O ile kae ha A tloha? Bibebe e boletse, "O ile a nyoloha. O ile ho bolella meeaa e teronkong, e sa kang ea baka matsatsing a mamello ea Nohe." Soule ea Hae, Moea oa Hae, theofani ea Hae ea boleng ba Hae ka Sebele, e ile ea theoha. A re Mo saleng morao. Na le ka rata joalo, bosiung bona, ho Mo sala morao metsotso e 'maloa? A re boneng moo A ileng teng.

⁷⁸ Ka tlasana ho linqalo tsa batho ba phelang nakoana ke selika sa matla a bademonia; katlasana ho moo...ka holingoana ho sona ke meeaa ea ba sa loka; ka tlasana ho eona ke 'muso oa Satane, lihele. Ebe holingoana ho rōna ke Moea o Halalelang; tlas'a Aletare ho robetse meeaa ea batho ba lōkileng; ho ntoo latela Molimo ka Sebele. Se seng se ea tlase, se seng se ea

holimo; meea e 'meli holim'a lefatše lena, e hahlamelang batho ba lefatše lena.

⁷⁹ 'Me Jesu mohla A na a shoa, O a nocoloha, tlase mane. Ke Mo bona ka thapama eo ea Labohlano, kamorao ho lefu la Hae, [Moena Branham o a kokota—Mohl.] ho kokota monyako oa linqalo tsa ba timetseng. A re Mo saleng morao motsotso. Monyako o a buloha. Mono ho fumanoe basali, mono ho fumanoe banna, mono ho fumanoe maleiti a macha, mono ho fumanoe maqheku, ba 'moho bohole tulong e harolang letsoalo eo e bitsoang teronko ea meea e timetseng.

⁸⁰ Hola ke na le nako, nka rata ho le phethela. 'Me e ka ba pono feela. Empa nkile ka etela nqalo eo, 'me ka lla ke batla ho hauheloa, mohlang oo ke le moetsalibe 'me ke ea etsoa oporeishene. Eitse ha ke tsoa, ke ne ke eme Bophirimela, ke phahamiselitse matsoho a ka nqa Leholimō, 'me sefapano se chabetse holim'a ka.

⁸¹ Empa tulong e mahlonoko eo, Jesu a kena monyako. Ntho e 'ngoe le e 'ngoe e ne e tlamehile ho paka hore E ne e le Mora oa Molimo, hobane ba ne ba rereloe matsatsing a mamello ea Nohe. Ho kokota monyako, O itse, "Ke 'Na Ea boletsoeng ke Henoke. Ke 'Na Peō ea mosali, e neng e tla khoba hlooho ea noha. Lentsoe le leng le le leng la Molimo le ne le phethiloe; Ke sa tsoa shoa koana Kalvari, 'me Ke lefeletse Kereke ea Ka. 'Me ke eo Ea boletsoeng ke Henoke, Ke Eēna." 'Me ba ne ba se na mohau, ba se na tšepo, hobane ba ne ba sitiloe. 'Me eaba monyako o khahleloa ka pel'a sefahleho sa bona.

⁸² Ho theoha ho kena linqalong tsa bademon! Ho theoha ho theohela likhorong tsa lihele! O kokota monyako. [Moena Branham o a kokota—Mohl.]

⁸³ Mona ke mohla A na a le lebitleng, 'mele oa Hae, o ne o emetse tsoho. O etetse linqalo tseo ba lokileng le ba sa lokang ba eang ho tsona; moo le uena u tla ea teng le leng la matsatsi ana, ho e 'ngoe kapa linqalong tse ling.

⁸⁴ 'Me O a kokota [Moena Branham o a kokota—Mohl.] monyako oa lihele. 'Me, hoba A etse, liabolosi a tsoa. 'Me ke mo utloa feela a re, "Oh, qetellong U hlile ua fihla. Ke hopotse ke U fumane ha ke bolaea Abele."

⁸⁵ Ua bona, mohla Peō eo e ne e tšepisoa tšimong ea Edene, liabolosi o lekile khafetsa ho timetsa Peō eo. 'Me lefu la Abele, le ho fihla ha Setha, e ne e le lefu feela, kepelo, le tsoho ea Kreste. Peō eo e tlameha ho tsoelapele. 'Me o ile a leka ho E timetsa.

⁸⁶ O itse, "Ke hopotse ke U fumane ha ke timetsa Abele. Ke hopotse ke U fumane ha ke timetsa baporofeta. Ka kholoa ruri hoba ke U fumane ha ke khaotse Johanne hlooho. Empa joale, qetellong ea tsohle, U fihlile. Joale ke U fumane." Oh, banna!

⁸⁷ Ke Mo utloa a re, “Satane, tloo mona!” Joale ke Mpōli. O a nanabela, o phamola senotlolo sa lefu le lihele lehlakoreng la hae, ho li nokela lehlakoreng la Hae ka Sebele. “Ke batla ho u kata tlhokomeliso. U thetsitse halelele ho lekane. Ke ’Na Mora oa Molimo o phelang ea tsoetsoeng ke moroetsana. Mali a Ka a sa ntse a le mongobo sefapanong, ’me molato ohle o lefiloe! Ha u sa na litokelo tsa letho. U hlobolisitsoe. Mphe linotlolo tseo!” Ke hantle. Ho retoloha a mo raha ka sefutho se mahetla, a ba a khahlela monyako, le ho re, “Lula ka mono! Ho tloha joale Ke Mpōli.”

⁸⁸ Joale, O ne a sa tšoara linotlolo tsa ’Muso, hoba O li file Petrose; re tla kena ho eona eohle hoseng, kolobetsong ea metsi. Empa o ne a tšoere linotlolo tsa lefu le lihele, ’me O ile a i nka; kamora tsoho ea Hae, O itse, “Ke tšoere linotlolo tsa lefu le lihele.” Petrose o ne a tšoere linotlolo tsa ’Muso. Satane a tšoere linotlolo tsa lefu le lihele; empa joale Jesu o li tšoere, Ke ’Mpōli.

⁸⁹ Ke enoa O a nyoloha. Paseka e se e tla thoasa; nako e feta kapele. Empa sehlopha se seng se teng. Jobo o kae? Abrahama o kae? Ebe ba ho kae? Mathaka ao ileng a tšepa Lentsoe la Molimo a kae? Na ebe O ba lebetse? Na ebe lefu le ba timelelitse? Ana e ne e le ho fela ha eona eohle? Lekhale, lekhale; Molimo o tlameha ho boloka Lentsoe la Oona.

⁹⁰ Ke a ’Mona. A re nyare leng ka Paradeising nakoana, re shebe koo. ’Me ke bona Sara le Abrahama ba ntse ba itsamaela mono, ’me ka morao ho nakoana [Moena Branham o a kokota—Mohl.] ntho e teng monyako. Abrahama o tloha ho ea bula monyako, ho re, “Moratuoa, tloo mona. Sheba mona! Sheba mona, ke eèna Ea neng a eme le ’na tlas’ a eike letsatsing leo.” Ke Molimo oa Abrahama.

⁹¹ Lekhatheng leo ke bona Daniele a hetla holim’ a lehetla la hae, le ho re, “Leo ke Lejoe le khephotoseng thabeng, ka ho tiea joaloka ha ke eme mona.”

⁹² Ke bona ho ema Jobo, ho re, “Ke Molopolli oa ka eo ke itseng ke mo tsebile hoba o a phela, ’me O ne a tla ema holim’ a lefatše ka letsatsi le leng. Mohlomong ’mele oa ka ha se letho haese melora e tlalang khabana feela, empa metsotsong e leshome le metso e mehlano ho tloha joale ke tla be ke kene ho ona hape. Ke Eèna eo.”

⁹³ Ezekiele a sheba kaholimō, a re, “Ke bone Motho eo a le joaloka Lebili le bohareng ba Lebili, le phethohang, holimō koana sebakeng.” Oh, banna!

⁹⁴ Eaba ho nyoloha Henoke. Henoke a re, “Ke Mo bone a e tla le bahalaleli ba Hae ba leshome la likete, ho lihela kahlolo.”

⁹⁵ Bao e ne e le bahalaleli ba Testamente ea Khale ba eme mono, ehlile bo, tlas’ a pheko ea mali. Ba ke ke ba kena ka pel’ a Sefahleho sa Molimo, Molimo oa Leholimō, hobane mali a pōli le a nku a sitiloe ho tlosa sebe.

⁹⁶ Empa O itse, “Banabesō, le nahana hantle ha le re ke eèna. Ke ’Na Peō ea mosali. Ke Mora oa Davida. Ke Mora oa Molimo. Ke Ea tsoetsoeng ke moroetsana. Mali a Ka a se a phekotse. E sa le le eme tlas’ a mali a linku le lipōli, empa joale Mali a Ka a phekola, ’me le lokolohile. A re nyoloheng, Paseka e se e batla e thoasitse.” Nahanang feela, e ka ba feela lilemo tse sekete le makholo a robong le ho hong tse fetileng, bosius bona.

⁹⁷ Ke utloa Abrahama a re, “Morena, e tla re ha re khutlela ‘meleng oa rōna hape; ’me ’na le Sara re ne re rata haholo; ha U tsotelle ha re ka khefutsa nakoana, mohlomong, tseleng ea Hao?”

⁹⁸ Be, ke Mo utloa a re, “Khele, che, ehlide che. Ke tla hlola le barutuo ba Ka matsatsi a ka bang mashome a mane. Le ka sheba kamoo lintho tsohle li lutseng kateng!”

⁹⁹ Hoseng ho khanyang hoo ha Paseka (re tla e ntšeletsa hoseng, ha Morena a ratile) eitse ha A tsoha bafung, Bibele e boletse, ho latela Santa Mattheu 27, ho itsoe “Bahalaleli ba bangata ba robetseng leroleng, ba tsoile mabitleng.” E ne e le mang? Abrahama, Isaaka, Jakobo, Jobo, bao ka tšenolo e senotsoeng ka moea ba tsebileng hobane Molopelli o tla ema lefatšeng tsatsi le leng. Ke bona bao, lithakangoaha tsa ba robetseng. Ke bao ba kena motseng. Ke bona Sara le Abrahama, ba le bacha, ’me ba tletse... ba le batle, ’me—’me ba khabile ka bophelo, ba ke ke ba hlola ba tsofala, ba ke ke ba hlola ba kula, ba ke ke ba hlola ba lapa, ba tsamaea ka ’mele oa bona.

¹⁰⁰ Kaiafa o eme mono, a ntse a re, “Ua tseba ke’ng? Ntho e etsahetse tsatsi le leng, shebang bohlasoa bo ka har’ a tempele ena! Ho na le... Re tlameha o fumana motho ea rokang kharetene eo. Shebang lintho tsane, lingalo tsa sehlabeled li hlaname. Ho etsahetse’ng? Na ebe Mothaka eo e ne e le molepi oa linaleli? Na ebe E ne e le moloi? Kapa, ho etsahetse’ng? Khele! Tloo koano, Josefase, bathoana ba babeli bao ba emeng mono ke bo mang?”

Abrahama a re, “Sara, ba re hlokometse. Re mpe re tsoe.”

¹⁰¹ “Ho itlhahisa ho ba bangata!” E ne e se ho fela hoo. Ho koaleng, shebang. Tsatsi le leng hoba A...ba ne ba etile; Abrahama, Isaaka, Jakobo, le bao bohole ba ne be etetse lefatše leo. Ea re ha Jesu a nyoloha... .

¹⁰² U re, “Moena Branham, na taba eo ke khopolotaba?” Che, mongali! Ke tla le bontša eona Mangolong, motsotsong.

¹⁰³ Eitse ha A qala a nyoloha, ba bone Eèna feela, empa bahalaleli ba Testamente ea Khale ba tsamaile le Eèna, hoba Bibele e boletse “O isitse ba tlamiloeng tokolohong, a neha batho linea.” ’Me ke ’Mona A nyoloha, le ho teana le kereke ea Hae.

¹⁰⁴ Mangeloi a mabeli ho a neng a letsa sehlopheng sa ’mino, a ile a khutla, ’me a re, “Lōna banna ba Galelea, le eme ke’ng le

leletse holimō? Hoba eèna Jesu enoa, ea nyolotsoeng, o tla khutla hape.” Ruri! Eaba a potlaka ho iteanya le mokoloko.

¹⁰⁵ ’Me Jesu le bahalaleli ba Testamente ea Khale ba haola sebakeng ba ikela. Ba feta khoeli, ba feta letsatsi, ba feta linaleli. ’Me eitse ha ba hlahella tšenola e khôlô eo, ea Maholimō a matle a masoeu, bahalaleli ba Testamente ea Khale ba hlabo mokhosí, ba ntse ba qotsa Lengolo, “Iphahamiseng lôna, menyako ea ka mehla, le iphamise! Iphahamiseng lôna, menyako ea ka mehla, le iphamise! Ho tle ho kene Morena oa Khanya!”

¹⁰⁶ Mangeloi ohle a phuthehela holim’ a liotloana tsa Lehelimō, a re, “Morena enoa oa Khanya ke mang?”

¹⁰⁷ Bahalaleli ba Testamente ea Khale ba itse, “Morena oa makhotla, e leng ea matla ntoeng! E ne e le Mohloli!”

¹⁰⁸ Lengeloi la khoatha konopo e khôlô, ’me menyako ea liperela ea bulela ka bobatsi.

¹⁰⁹ Hantle har’ a Motse oa Jerusalema ha hlaho e moholo eo, Mohloli ea matla, a tlisa bahalaleli ba Testamente ea Khale. Sehlopha sa ’mino oa Mangeloi se ntse letsat, nakong eo Mangeloi a hlabang litlatse. E ne e le Mohloli ea matla! O ne a tšoere linotlolo tsa lefu le lihele li leketlile lephakong la Hae, ho feta hantle pel’ a lipaleisi tsa Khanya A ba a fihla Teroneng. ’Me O itse, “Ntate, ke bana. Ba ile ba lumela, ka tumelo Lentsoeng la Hao, hore Ke tla khutla tsatsi le leng. Ke hlotse lefu le lihele ’moho.” E ne e le eng, moena? Letsoho la Hae le le mehoabali, ho supa hobane O tsoa ntoeng. Khanya ho Molimo Holimôlimô! Ke Mohloli ea matla! “Ke bana, Ntate; Abrahama, Isaaka, le Jakobo.”

¹¹⁰ Ke Mo utloa a re, “Mora, hloella lehlakoreng la Ka mona, lula fatše Ke be ke behe sera se seng le se seng tlas’ a bonamelo ba maoto a Hao.” Moena, O tla khutla tsatsi le leng, kana e tla ba letsatsi le le kakang!

¹¹¹ O ne a sa robala lebitleng A le lesisitheho. Re hopola hobane O ne a robetse mono feela, a shoele. Empa O ne a theohile a ntse a hapaka, O ile a theoha a amoha Satane linotlolo, O tšoere linotlolo tsa lefu le lihele, bosiung bona. O itse, “Hobane Ke a phela, le lôna le phela, ke hona.”

¹¹² Ke a ipotsa bosiung bona, moena oa ka, khaitseli, na u e nahanisitse ka botšepehi? Na u a elelloa u phela hobane A phela? Ana u e ananetse ho lekana ho fihlela u inehela, le ho re, “Molimo, ke ’na enoa, moetsalibe, nkauhele”? Na u kile ua amohela Sehlabelo seo se ruileng bokhoni-bohle? Na u kile ua ’Molella hore u a Mo rata? Na maikutlo a hao a utloa bohloko ha u etsa phoso? Ha u eso finyelle boiphihlelo boo le joale, lepatong lena! Athe, nako ea rôna e a tsamaea. Ke ikutloa monate feela! Empa, ke a ipotsa, haeba u eso amohele Kreste joaloka Mopholosi oa hao, ke a ipotsa na u ka etsa joalo re sa inamisa lihlooho tsa rôna nakoana polelong ea thapelo.

¹¹³ Letsa seo, *Har'a Mafika A Petsohang*, ka kōpo, Khaitseli Gertie, haeba u se tšoere. Ho lokile, sefe feelsa se ka loka.

¹¹⁴ Ka lihlooho tsa rōna tse inamisitsoeng, ke tla le botsa potso e mahlonoko e tille. Hopolang metsoalle, moetsalibe kapa mohalaleli, ha u patoa ha se ho fela ha hao. Soule ea hao e 'nga e 'ngoe. Joale, Jesu o etetse linqalo tse peli tseo, ho latela Mangolo. Ebe O tla u fumana kae ha u ka tsamaea bosiung bona? Na ebe monyako oa mohau o tla khahleloa ka pel'a sefahleho sa hao, ka hobane o hanne? Hopola, Eèna ha se Mopholosi feelsa, Ke Moahloli. Hona joale u moahloli, ebe u Mo ahlola joang? Mo etse Mopholosi oa hao hona joale.

¹¹⁵ Ke hopola pale. Moshanyana o ne a lutse e-e koloing. Sethunya sa lla tlase seterateng, eaba lipere li a baleha 'me li se li ea oela selomong. Eaba mocha oa lek'hauboi o matha a emisa lipere pele koloi e oela selomong, hoba lesea le ne le palame ho eona. A pholosa bophelo ba mothoana eo.

¹¹⁶ Lilemo tse ngata hamorao, ke ha ho engoe lekhotleng. Eèna moshanyana enoa o ne a entse bonokoane, a ile a nka tsela e phoso, a le molato. A ntse a noa, a mokola, a thunya monna; 'me a le molato, a fumanoa a le molato. 'Me moahloli a phahama a re, "Ke u ahlolela ho fanyehoa ka molala oa hao ho fihlela bophelo ba hao ba nakoana bo phorotsehile ho uena."

¹¹⁷ Monnana eo a re, "Moahloli!" 'Me a sitisa tsamaiso ea lekhotla, a tlola moeli oa litšepe 'me a itihela maotong a moahloli, ho hauheloa. A re, "Moahloli, sheba sefahleho sa ka! Ana ha u ntsebe?"

A re, "Che, mora, ha ke khone."

¹¹⁸ A re, "Na u hopola mohla u pholosang bophelo ba moshanyana ea itseng, lilemong tse ngata tse fetileng, mohla pere e ne e baleha?"

A re, "E, ke a e hopola."

¹¹⁹ A re, "Ke 'na moshanyana eo." A re, "Moahloli, u mpholositse mohlang oo. Mpholose joale!"

¹²⁰ Moahloli a mo sheba, 'me a re, "Mora, mohlang oo ke ne ke le mpholosi oa hao. Kajeno ke moahloli oa hac."

¹²¹ Kajeno Ke Mopholosi oa hao. Moetsalibe, hosane E ka ba Moahloli oa hao. A re e nahanisiseng joale, 'mino o sa letsoa. 'Me e mong le e mong o a rapela, bao ba mabaleng a thapelo 'moho le Molimo.

¹²² Ke a ipotsa bosiung bona joale, ka potlako, ba ratang ho amohela Kreste joaloka Mopholosi, ho re, "Molimo, nkauhuhle, 'na moetsalibe. Ke batla ho tla ka Mali a tšolotsoeng. Ke khathetse ho ingolisa likerekeng ho matha ho tloha tulong ho ea tulong. Ke batla ho tsoaloa labobeli. Ke batla boiphihlelo bo tsebang ka pelöng ea ka hore Kreste o Itšenoletse 'na, ka tšenolo ea moea eo u buileng ka eona, Moena Branham. Ke batla

tšenolo ea moea, Moea o Halalelang pelōng ea ka, ho mphelisa, ho hlahisa bonnete ba Kreste ho 'na ho feta kamoo ke itsebang kateng. Ke lakatsa bophihlelo boo, Moena Branham. Na u tla nthapella ke sa phahamisa letsoho la ka?" Na u ka phahamisa letsoho la hao joale, uena ea lakatsang ho hopoloa. Molimo a u hlohonolofatse, leleiti. Molimo a u hlohonolofatse morao mono, leleiti. Ke botle. Molimo a u hlohonolofatse, monghali. Ke botle. Phahamisang matsoho a lōna, joale nyoloha hantle ka letsoho la hao.

¹²³ Na u ka ba lihlong? Na u hana ntho e kang Eo, motsoalle? Hopola.

¹²⁴ "Oh," u re, "Moena Branham, bareri ba rerile lilemo tse ngata." Ke a tseba, empa ba tla emisa ho rera le leng la matsatsi ana. 'Me ka chebo ea lintho, e ka etsahala hang. U tla utloa therò ea hao ea ho qetela. Ho bua 'nète, ena e ka ba ea hao ea ho qetela ena.

¹²⁵ "Oh," u re, "Ke mocha." Ha se lebaka. Lefu ha le hlomphe motho, kapa lilemo kapa bokhoni.

¹²⁶ Na u ka Mo amohela joale joaloka Mopholosi oa hao, ka ho phahamisa letsoho la hao, ho re, "Molimo, nkhanhule?" Phahamisa matsoho a hao 'moho le bana bohole, le ho re, "Joale ke batla ho amohela Kreste." Na u ka phahamisa letsoho la hao?

¹²⁷ Motho ea oeleng mohaung, a re, "Molimo, nkhanhule. Ke batla ho khutlela ho Kreste bosiusing bona, hore hosane e be tsoho ho 'na, e ncha, bakeng sa ka." Na u ka phahamisa matsoho a hao? Nyolla letsoho la hao, ho re, "Nkhanhule. Ke batla ho tla joale." Na u tla etsa joalo? Phahamisa letsoho la hao, ho re, "E sa le ke oele mohaung, empa bosiusing bona . . ." Molimo a u hlohonolofatse, leleiti. Molimo a u hlohonolofatse. Ke botle. "Ke tla amohela Kreste joaloka Mopholosi oa ka. Ke tla Mo amohela bosiusing bona. Ke lelerile, lilemo tse ngata hole le Molimo, empa joale ke khutlela hae." Na u tla Mo amohela bosiusing bona, hore ena e tle e be tsoho e ncha ho uena, bophelo ba hao ba khale bo tle bo fete?

¹²⁸ Mofumahali enoa o nyolohela aletareng, ho ipolela, ho ema. U teng motho e mong ea batlang ho nka malulo a hae mona, ho nyolohela mona le eēna, maipolelong a bona? Na u ka ema, ua nyolohela aletareng, le uena. Aletare e butsoe. Ruri. Nyoloha u tle hantle, hona joale. Ha u batla ho ema mona le ho rapela, ho tla itokela hantle feela. Tloo hantle. Na u ka tla? Holim'a boipolelo ba tumelo ea hao, holim'a tumelo ea hao ho Mora oa Molimo, na u ka tla joale? Ke hantle.

¹²⁹ E itšetlehile ho uena, u hopole. Ke uena motho. Na u moetsalibe? Na u oele mohaung? Na u a bata 'me u hole le Kreste? Na u batla ho tsosoa le Eēna bocha joale, ho qala bophelo bocha? Ho ka thoeng ka uena, monna le mosali e sa le ba—e sa le ba qabana nako e telele, le phehisana lelapeng la lōna? Na le ke ke

la tla la rarolla taba eo le Molimo le lipakeng tsa lōna ba babeli joale? Ho fetola Paseka ho ba Paseka ea mannete ho lōna, ho qala lelapa le lecha.

¹³⁰ Ho ka thoeng ka uena ea e-song ho khone, ea e-song ho tšoare thapelo ka lapeng la hao, u ea lapeng feela ho tsoa kerekeng 'me u leka ho phela ka bokhabane boo u bo khonang, le ka mohla ha u phuthe lelapa 'moho ho rapela? Lebaka leo re fumanang botlokotsebe ba bana le lintho tseo re li fumanang. Lebaka leo malapa a Amerika a pshatlehileng. Na u ke ke ua tla, ho qala bocha bosiusg bona? Na u tla e etsa? U a mengoa. Le hopole, ke moreri oa lōna joale; ke tla ema ke le paki ka letsatsi lela.

Re sa inamisitse lihlooho tsa rōna, le hona, joale bakeng sa thapelo.

¹³¹ Ntata rōna ea Bokoang oa Maholimō, bosiusg bona re U tlisetra letšoele lena, ka botsepehi bo khethehileng ka ho fetisa le bo mahlonoko kamoo re tsebang ho e sebetsa. Re atamela Terone ea Hao ka boikokobetso. 'Me kamorao ho Molaetsa bosiusg bona, hoo, lepato le leholo leo, ha A ka a robala ka khutso, moea oa Hae o ile linqalang 'me oa qetella mosebetsi oa Molimo, oo A neng a tlotseliso ho o phethisa. 'Me hosane hoseng, re fumana moo A haotseng likeng tse holimō, a ntse a hlola ntho e 'ngoe le e 'ngoe, tsohong ea Hae. Empa O tsoile hoseng ha Paseka bakeng sa tokafatso ea rōna. 'Me re Mo fumana a boetse a rometse Moea o Halalelang, ho ahlola sebe sa batho.

¹³² 'Me re a rapela bosiusg bona, Morena, bao ba phahamisitseng matsoho a bona ba hopoloe ka pel'a Hao. Qeto ea bona e tsoe pelōng ea bona bosiusg bona, hore ba U amohetse, 'me ba U lumetse, ba ke ba tiisoe ka Tiiso ea tsepiso bosiusg bona, Moea o Halalelang. Aba sena, Ntate. Hoba, re ba laeletsa ho Uena, 'moho le Molaetsa ona bosiusg bona. O hlohonolofatse ba O utloileng, bao, Morena, ba tla ea le Oona lapeng la bona, le ho O tebisa ka botebo lipelōng tsa bona. Ba ke ba phele ka Lentsoe la Molimo. Aba sena, Ntate, hoba re e kōpa ka Lebitso la Kreste. Amen.



LEPATO SST57-0420
(The Entombment)
LETOTO LA TSOSELETSO EA PASEKA

Molaetsa ona ka Moena William Marrion Branham o reriloe sethatong ka Senyesemane Moqebelo mantsiboea, 'Mesa 20, 1957, Branham Tabernakel, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org